

**Landesbibliothek Oldenburg**

**Digitalisierung von Drucken**

**Dissertatio Exegetico-Critica Exhibens Vindicias  
Integritatis S. Scripturae Qvo Ad Locvm Vexatissimvm 2.  
Chron. XXII, 1.2 De Annis Ahasiae**

Consentiente Venerando Theologorum Ordine - A. D. X. Decembris A. R. S.  
MDCCI ... Pro Loco Professionis Theologicae Ordinario Pvblice Defendet

**Lilienthal, Theodor Christoph Lilienthal, Theodor Christoph**

**Regiomonti, MDCCL**

**VD18 90565665**

§. XXVII.

**urn:nbn:de:gbv:45:1-15091**

pulus terrae percussit ) ; et ob teneram ipsius aetatem, quum occiso parente, annum vix egerit octauum. 2 Chron. XXXIII. 35. Cap. XXXIV. 1. Iosiae vero filium Ioahasum iterum in locum defuncti parentis suffecit populus Iudaicus, et quidem praeterito fratre natu maiori (\*), adeoque legitimo regni haerede Eliakimo, ob quam iniustam electionem Rex Aegypti Ioahasum amouit, regionique multam centenorum talentorum argenti et talenti auri imposuit. 2. Chron. XXXVI. 1-3. Ex hisce exemplis merito concludimus, rationem cur electionis populi mentionem facit historia sacra, non aliam esse, nisi quod extraordinarii quid tunc obtinuerit in successione. Idem dicendum erit de Achasia, qui quamuis proximum ius ad regnum nondum habuerit, repudiato Ioahaso pupillo, ad regalem dignitatem a populo admotus videtur. Non desunt in historiis similia tutorum pupillos supplantantium exempla: quod eo maiori facilitate facere poterat Achasia, quo maiorem sibi inuidiam Ioramus caede fratrum suorum conciliauerat; adeo vt populus Achasiae potius a Iosaphato et Ioramo adoptato, quam filio tyranni Ioahaso parere maluerit. Accedit, quod maior vtique ab Achasia protectio expectanda erat, domui Israelis affinitate coniuncto, quam a Ioahaso duorum vel trium annorum infante; qui secundum omnem probabilitatem, demum post abductam cum reliquis Iorami vxoribus Achabi filiam, ex alia coniuge prognatus fuit, adeoque domus Israeliticae vix sperare poterat praesidium.

(\* ) Natus enim XXIII. annos erat Ioahas quum regnum adiret, quod tribus tantummodo mensibus tenuit. Sed qui immediate successit frater Eliakimus annum tunc egit XXV. 2. Chron. XXXVI, 2. 5.

### §. XXVII.

Secundum hanc nostram dubii solutionem, luculenter simul patet, quam stricte comminatio diuina de funditus euertenda vniuersa Achabi familia 1. Reg. XXI. 21-24. complementum sortita sit. Nimirum Iehu quotquot ex Achabi domo in Israele inuenit, Ioramum Israeliticum, Achasiam, Iesabelem, filios Iorami Israelitici et fratrum Achasiae filios, trucidauit 2. Reg. IX. 7. 8. 24. 27. 33. Cap. X. 7. 11. 13. 14. Mox Hierosolymis Athalia Achabi soror et Achasiae mater, totum semen Regium, excepto vnico Ioaso, eradicauit, 2. Chron. XXII. 9-11, Ipsa vero Athalia, postquam sex annis regnasset, occiditur Cap. XXIII. 15. Qui ex posteris Achabi superstes erat Ioasus, thronum quidem conscendit, et per quadraginta annos

F

regnum





regnum tenuit; violentam tamen mortem tandem euitare non potuit Cap. XXIV. 15. Successit ipsi in regno filius Amazia. Huius vero filios, si modo filiis praeditus fuit, obsides Samariam misit Ioas Rex Israelis, ubi probabiliter misere extincti sunt Cap. XXV. 27. Tandem et ipse Amazia a sibi subditis interfectus est. v. 27. Sic ultimus ex familia Achabi oriundus, violenta morte periit. Qui enim post Amaziam in thronum euectus est Vsia, ab eodem parente prognatus vix esse potest; quum filii Amaziae Samariam abducti sint, in qua captiuitate sine dubio diem obierunt. Filius adeoque adoptitiuus Amaziae fuisse videtur Vsia, cui nec sine populi consensu aditus ad regnum patebat 2. Chron. XXVI. 1. Idem vero Matth. I. 8. vocatur Iorami filius; vnde colligimus, quod Iorami fuerit ex Ioahaso nepos, adeoque ex familia Achabi non oriundus. Filiam enim Achabi, vna cum reliquis vxoribus et liberis Iorami, interfecerant Arabes et Philistaei 2. Chron. XXI. 17. qui Ioahaso haud pepercissent, si tum temporis natus iam fuisset. Hinc post tristem hunc euentum, aliam sine dubio duxit vxorem Ioramus, ex qua Ioahasum Vsiae parentem suscepit; ad quem proinde comminatio diuina de extirpanda Achabi familia extendi nequit. (\*)

(\*) Ioas quidem Achasiae filius 2. Reg. XIV, 13. vocatur filius Ioahasi 2. Chron. XXV, 23. Ast quia Achasia et Ioahas vna eademque persona esse non potest (§. 21.) difficultas haec optime tolli poterit, si dicamus, Ioramum eo tempore, quo Achasiam adoptauit, eiusque fidei filium suum commisit, eidem simul nomen Ioahasi impertisse; quo indicaret, quod non nisi nomine Ioahasi reipublicae praeesse deberet.

#### §. XXVIII.

Quae contra §. praecedentem formantur dubia, facilem admittunt solutionem. Monet Cel. BAUMGARTENIUS, vaticinium de interitu domus Achabi 1. Reg. XXI. 21-24. conferendum esse cum instructione, quam Iehu 2. Reg. IX. 7. 8. accepit: qui etiam vnctus dicitur ad excindendam domum Achabi 2. Chron. XXII. 7. et instrumentum fuit, per quod comminatio diuina adimpleta est 2. Reg. X. 10. 17. Quum vero Iehu nec Athaliam occiderit, nec Ioasum, nec Amaziam; inde patere existimat, vaticinium illud non ad omnes et singulas personas ex Achabi familia oriundas extendendum esse, sed cum restrictione quadam intelligendum, nec euentu caruisse, quamuis vel maxime nonnulli domui Achabi affinitate iuncti violenta morte haud perierint; siquidem historia sacra nec filiae Achabi Iorami coniugis, nec sororis Achasiae Iosebae interitum commemorat. Verum

rum

